

17. januar 2019

Inatsisartut Suleriaasianni § 36 naapertorlugu apeqquteqaat aallaavigalugu oqallinnissamik siunnersuut imaattoq matumuuna saqqummiupparput:

Apeqquteqaat aallaavigalugu oqallinnissamik siunnersuut: Ingerlatseqatigiiffissuit Namminersorlutik oqartussanit pigineqartut siunissami inuiaqatigiinni qanoq iliuusissatigullu pilersaarutini qanoq inissisimatinneqassappat.

(Inatsisartunut ilaasortaq Karl-Kristian Kruse, Siumut)

Tungavilersuut

Siullermik nuannaarutigaa oqallinnissamik siunnersuut manna saqqummiussinnaagakku.

Nunatsinni suliffeqarfiit pisortat pigisaat – taamaasillutalu inuiaqatigiit tamatta pigineqataaffigisavut – suliffeqarfiit taakku assigiinngitsutigut kiffartuussisuupput, uagut inuiaqatigiit ikittuinnaalluta nunarujussuarmi siammasissumik imminnullu ungaseqisunik najugaqarfeqarluta pisariaqartitagut assigiinngitsut qulakkeerniarlugit.

Ilaatigut assersuutigalugu innaallagissiornikkut kiassarnikkullu pisariaqartitagut Nukissiorfinniik neqeroorutigineqarput.

Aamma taamatut qiviarsinnaavarput KNI. KNI'p ingerlappai Pilersuisoq Polaroil-ilu. Avinggarusimasut nunaqarfiillu nioqqutissanik pisinarfeqarnikkullu qulakkeeqqavai inuit taakkunani najugallit kiffartuunneqarnerat, Polaroil-ip nunarput tamakkerlugu ikummatissamik pilersorpaa.

Nuna tamakkerlugu kiffartuussisut suliffeqarfiit taakku, pisortanik pigineqartut aaqqissuusaaneri ukiorpassuit ingerlanerini ineriartorput allanngorarlutillu, ilaatigut apeqqutigerusussinnaasarlutigu suliffeqarfiit eqaannerusumik akilersinnaanerusumillu ingerlanneqarsinnaannginnersut, aamma piffissanngunnginnersoq suliffeqarfiit Namminersorlutik oqartussanit pigineqartut ineriartorteqqillugit aaqqissuuteqqinneqarnissaannut.

Siunnersuut manna periarfissaasinnaasunik oqallinnissamik nalilersuinissamillu ujartuisuuvoq, inuiaqatigiinni marloqiusamik allaffissornikkut ingerlatsinnginnissamik aammalu ineriartornermut aaqqissuuseqqinnernullu pisariaqartunut innarliinngitsumik uagutsinnullu akisuallaalertinnginnissamik.

Isumaqarpunga pingaaruteqartoq isiginiassallugu suliffeqarfiit nunatta pigisaasa aningaasarpasuit atungikkaluarlugit nutarteriffiginissaat suliffeqarfittut pitsaanerpaanngortinnissaat anguniarlugu, matumani amigaataasoq unaavoq periaatsip ajunngitsup naninissaa. Assersuutigalugu umiarsuali-

vinnut oqartussaasutut Royal Arctic Line inissimavoq umiarsualivinnik ingerlatsisuutigaluni aamalu pisortanit suliffeqarfiutigineqarluni, aammalu saniani Sikuki pisortanik suliffeqarfiutigi-neqartoq Nuummi umiarsulivimmik ingerlatsivoq.

Qanoq iliornissaq pillugu imminut akilersinnaanerpaamik toqqaareersimagaanni naak sorpassuit ilanngullugit nalilersuisoqaqqaartussaagaluartoq, taava pisariaqarpoq nalileqqissaassallugu tamanna inuiaqatigiinnut akikinnerusumi aaqqiissutaanersoq, assersuutigalugu inuiaqatigiinnut akikinnerunnginnerluni, Sikuki Royal Arctic Line´p ataanut inissikkaanni, soorlu Arctic Umiaq Line, taamaattoq.

Assersuutitut aamma qiviarsinnaavarput, Telepost-i. Allakkeriviulluni telekkut attaveqaatinik ingerlatsisoq, uani oqaluserineqanngilaq suliffeqarfiit immikkoortut marluk ingerlanneqarnissaat. Susassaqarfippassuupput sukumiisumik misissuiffigineqarnissamut naleqqussinnaasut, soorlu aamma mittarfeqarfiit Ineqarnerullu aqqissugaaneri siunissami qanoq aqqissussinnaavagut ingerlatsiviit akikinnerulersillugit pitsaanerulersillugillu, naatsumik oqaatigalugu: suliffeqarfinit taakkunannga siunissaq eqqarsaatigalugu suna kissaatigaarput.

Susassaqarfiit arlaqartut, soorlu mittarfeqarnikkut inissiaateqarnikkullu aqqissuussinerit akikinnerusut pitsaanerullu qanoq ittut siunissaq ungasinnerusoq isigalugu, pilersissinnaavagut?

Taamatut oqaaseqarlunga, Namminersorlutik oqartussanit pigineqartut Ingerlatseqatigiiffissuit Nunatsinni inuiaqatigiinni siunissami qanoq ingerlatsinissaat pillugu inatsisartut oqalilluarnissaat neriuutigaara.